

# INUIT ATAQATIGIIT

## Inatsisartuni



Nuuk, 14.02.2018

UPA2019/175

Inatsisartut suleriaasianni § 33 naapertorlugu matumuuna inatsisartunut aalajangiiffisassatut siunnersuut imaattoq saqqummiuppara:

**Maleruagassat atuuttut aqcutigalugit aalisarnerup aqutsivigineqarnerata allanngortinneratigut Upernaviup aqutsiveqarfiani qaleralittassiisutit tamakkerlugit aalisarneqarsinnaanissaannik UKA 2019 sioqqullugu qulakkeerinneqqullugit Naalakkersuisut peqquneqarnissaannik Inatsisartut aalajangiiffisassaattut siunnersuut.**

Inatsisartunut ilaasortaq Aqqaluaq B. Egede, Inuit Ataqatigiit)

Qaleralittassat pisarineqanngitsoortartut annertoqaat. Aningaasarsiornikkut suli pitsaannerusumik angusaqarsinnaanerput atorluagassaavoq. Ukiumut qaleralittassat tamakkerlugit aalisartoqartannginnera aaqqissuuseqqinnikkut aningaasarsiorluarnerulernissaq aalisarluarnerulernissarlu angusariaqarpagut. Aningaasartuutissarpassuaqarpugut. Taamaamat aamma aningaasarsiorfissanik atorluanerunissarput pikkoriffiginerusariaqarpugut.

Aalisarneq ingerlalluarpat suliffissaqartitsiniarneq patajaannerusarpoq, ilaqutariit imminnut pilersorsinnaanerata patajaannerusarpoq, taamatullu inuiaqatigiinni ineriartorneq aningaasarsiornerlu aamma patajaannerusarlutik. Isumaqarpunga ukiakkut kingusippallaartukkut qassusersorluni qaleralinniartitsisarneq immap sikusarneratigut aalisartunut annertuumik killiliisartoq. Upernaviup eqqaanilu sikusarnerata ukiuni kingullerni aalaakkaajunnaariartornerata kingunerisaanik qassusersorluni qaleralinniarsinnaaneq killersortuartaq. Tamanna pisassiisutit tamakkerlugit aalisarnissaraluamik pinngitsoortitsisarpoq.

Pissutsit aaqqinneqartariaqarpugut. Aalisarnerup ingerlalluarnerusinnaagaluarnera, nunatta inuisalu taamaalillutik angusarissaarnerusinnaagaluarnerat pinngitsoortinneqartartoq aaqqiiviginiarlugu Naalakkersuinikkut anguniagaqartoqarpasinnnginnera naluara paatsooqatigiinnermik aallaaveqarnerasoq, imaluunniit aaqqiissutissanik nassaarniallaqqissuseqarneq Naalakkersuisoqarfiup tappiiffisimaneraa eqqoriaruminaappoq. Nalunangitsoq tassaavoq, tamatta suleqatigiinnerulluta aaqqiisariaqaratta.

Upernaviup aqutsiveqarfiani aalisartut aalisarluarsinnaanerata piffissalersuinikkut umiarsuarnillu tunitsivilersuinerunikkut naleqqussarneqartariaqarpugut. Nukittunerulernissatsinnut sakkussat aqcutissallu tamaasa kigaappallaamik aaqqinniaasaartuarsinnaanngilagut. Aalisartut piareersimapput. Aalisartut pinngortitamit aporfilersorneqanngikkunik aalisarumapput. Aalisartut periarfissinniartigit. Uaniami pineqartut tassaapput ukiumut pisassiissutaareersut atorluarneqarnissaat.

Qaleralittassat pisarineqanngitsoortartut ima annertutigisarput, aalisarneqarsinnaasuuppata aalisartunut, kommunimut, inuiaqatigiinnullu tamanut aningaasarsiornikkut nukittorsaataasinnaagaluarlutik. Taamaalilluni inuiaqatigiit pisariaqartitaannut allanut aningaasaliisinnaanermut aamma nukittorsaataasinnaagaluarlutik. Ingsattajaarlunimi oqartoqarsinnaavoq ukiuunerani immap sikusarnera atorluarlugu pisassiissutinik killilersimaarinnittoqartutut allaat paasineqarsinnaasumik maannakkut qassusersorluni aalisarneq piffissalersugaavoq.

# INUIT ATAQATIGIIT

## Inatsisartuni



Nalunngereerparput tamatta, aamma Aalisarnermut Naalakkersuisoqarfiup nalunngereerpaa pisassiissutit tamakkerlugit aalisarniarneq Upernaviup aqutsiveqarfiani ajornakusoortoq, aaqqinneqartariaqartoq, kisiannili ukiut arlallit taamaarusaartinneqartoq.

Taamaammat siunnersuut una saqqummiuppara, pisariaqarmat iliuuseqartoqannginnerata allangortinnissaa. Aaqqiisariaqarpugut. Neriutigaara siunnersuut akueralugu aalisartut aalisarnissaat nutaamik periarfissiilluarnikkut pisassiissutaareersut tamakkerneqartalernissaat anguneqassasoq. Taamatut oqaaseqarlunga siunnersuut Inatsisartunut suliassanngortippara.

### **Pisortanut aningaasatigut allaffissornikkullu kingunerisassat.**

Pisassiissutit tunniunneqareersut tamakkiisumik atorluarneqarnissaat qulakkeerumallugu qanoq iliuuseqartoqarnissaa Naalakkersuisut namminneq aalajangigassaraat. Maleruagassat atuuttut allangortinneqarnissaat, taamatullu aningaasaqarnikkut killiliussanik annertusaanissaq siunnersuummik matuminnga siunertaanngilaq – taamaalilluni taamaallaat pisassiissutit Naalakkersuisunit aalisartunut tunniunneqareersut atorluarneqarnissaasa qulakkeerneqarnissaa siunertaavoq. Taamaattorli iliuitsit suut pitsaanerussanersut qulaajarniarlugu allaffissornikkut nukissanik atorfissaqartitsisoqarsinnaavoq. Suliamut tamatumunnga aningaasartuutit AC malillugu aningaasarsiaqartinneqartup ikiup affaani sulineranut aningaasarsiaritinneqartunit amerlanerussanngitsutut missingiorneqarput, tassalu 250.000 kr.-inut – tamanna illuatungerisanik attuumassutilinnik tusarniaanerit ilanngutereerlugit.

### **Namminersorluni inuussutissarsiuteqarnermut aningaasatigut allaffissornikkullu kingunerisassat.**

Aalisartut attuumassutillit aalisagaqassutsikkut pisuussutinik pisassiissutaasunik atorluaanissaminnut pissutsit piviusut malillugit periarfissinneqassapput.

### **Innuttaasunut aningaasatigut allaffissornikkullu kingunerisassat.**

Aqutsiveqarfimmi aalisarnerulernerup kingunerisaanik inuussutissarsiuteqarfiit tapiliussatut taaneqarsinnaasut isertitaat annertusisussaavoq, taamaalillunilu aamma innuttaasut isertitaqarnerulernerannik kinguneqartussaalluni.